



Prop. 61 S

(2010–2011)

Proposisjon til Stortinget (forslag til stortingsvedtak)

Ekstra utbetaling til mottakarar av bustøtte som hjelp til å dekkje høge energiutgifter

*Tilråding frå Kommunal- og regionaldepartementet av 14. januar 2011,
godkjend i statsråd same dagen.
(Regjeringa Stoltenberg II)*

1 Innleiing

Kommunal- og regionaldepartementet gjer framlegg om å auke løyvinga til bustøtte i 2011 for å dekkje ei ekstra utbetaling til mottakarane. Den ekstra utbetalinga skal vere ei hjelp til å dekkje høge energirekningar for oppvarming av bustaden for dei som har låge inntekter.

2 Bakgrunn

I store delar av landet blei november månad den kaldaste på mange år, og sprengkulda heldt fram i desember. Kulda gjorde at forbruket av straum auka, og at prisane steig. Mange vil derfor få høge utgifter til oppvarming av bustaden. Det vil vere ei spesiell utfordring for dei med dårleg økonomi.

Bustøtta er målretta mot husstandar med låge inntekter og høge buutgifter. For desember månad 2010 fekk 122 500 husstandar bustøtte. Kvar husstand fekk i gjennomsnitt kr 2 143 den månaden, noko som svarer til kr 25 700 i året. Buutgiftene for dei som fekk bustøtte for desember var i gjennomsnitt kr 5 770, eller om lag kr 69 300 i året. Den årlege gjennomsnittsinntekta for alle husstandar som fekk bustøtte var kr 135 000, og kr 147 000 for husstandar med fem

eller fleire medlem. 55 prosent av husstandane som fekk bustøtte hadde inntekt frå pensjon eller trygd, 78 prosent bur i leigd bustad og 75 prosent bur aleine. Det er venta at talet på husstandar som får bustøtte vil vekse til om lag 125 000 i februar 2011.

Av dei 122 500 husstandane som fekk bustøtte for desember var utgifter til oppvarming med i utrekninga av bustøtta for om lag 74 000 (60 prosent). For om lag 16 000 av dei gjekk utgiftene inn i husleiga eller felleskostnadene og om lag 58 000 fekk dekt deler av utgiftene gjennom ein sjablong. For dei som får dekt oppvarming av bustaden gjennom husleiga/felleskostnadene, vil auka energikostnader bli delvis dekte så lenge dei samla utgiftene er lågare enn maksimalgrensa for buutgiftene.

Personar med inntekt frå pensjon eller trygd, og som ikkje får dekt kostnader til oppvarming gjennom husleiga eller felleskostnadene, får dekt utgifter til oppvarming med ein sjablong. Sjablongen er for tida kr 6 000 i året. Sjablongen ligg fast, og blir ikkje justert ved endra energiprisar.

Om lag 40 prosent av mottakarane av bustøtte får ikkje dekt nokon utgifter til oppvarming av bustaden, verken gjennom husleiga/felleskostnadene eller sjablong. Det er i hovudsak mottakarar av sosialhjelp og barnefamiliar, som ikkje tek imot

trygd eller pensjon, og som bur i bustader utan felles oppvarming.

Kor mykje høgare energirekninga vil bli for den einskilde husstand er vanskeleg å berekne. Det vil kome an på ei rekkje faktorar, og vil variere frå husstand til husstand. Det vil derfor vere vanskeleg å differensiere mottakarane av bustøtte etter kor mykje høgare energiutgifter dei vil få denne vinteren utan ei omfattande og tidkrevjande sakshandsaming med høge administrative kostnader.

Det er Husbanken som forvaltar bustøtteordninga og kommunane som utgjer førstelina ved handsaming av søknadene.

3 Tilråding

For å hjelpe mange av dei med svak økonomi som no etter den kalde førvinteren vil få høge utgifter til oppvarming av bustaden, gjer Regjeringa framlegg om ei ekstra utbetaling av bustøtte.

For å sikre at mottakarane får hjelp raskt, blir det gjort framlegg om ei ekstra utbetaling til alle husstandar som får bustøtte. Utbetalinga er eins for alle typar husstandar, men store husstandar får noko meir enn dei små. Beløpet er fastsett ut frå eit rimeleg skjøn. Det blir gjort framlegg om ei ekstra utbetaling på kr 2 500 for første medlem, og kr 100 i tillegg for kvart ekstra medlem i husstanden. Til dømes vil då ein barnefamilie på fem få ei ekstra utbetaling på kr 2 900.

Det blir lagt opp til at den ekstra utbetalinga kjem i byrjinga av mars 2011, på same tid som den ordinære utbetalinga av bustøtte frå Husbanken for februar månad.

4 Økonomiske og administrative konsekvensar

Det er berekna at framlegget om ei ekstra utbetaling av bustøtte vil føre til ein auke i utbetalinga av bustøtte med 318,5 mill. kroner i 2011. Dei administrative kostnadene i Husbanken som følgje av den ekstra utbetalinga er berekna til 2,0 mill. kroner. Den samla kostnaden blir dermed berekna til 320,5 mill. kroner.

5 Framlegg om endringar

Regjeringa gjer framlegg om å auke løyvinga til bustøtte med 318,5 mill. kroner i 2011, frå 3 830 mill. kroner til 4 148,5 mill. kroner, og å auke løyvinga til driftsbudsjettet i Husbanken med 2,0 mill. kroner, frå 320,2 mill. kroner til 322,2 mill. kroner.

Kommunal- og regionaldepartementet

t i l r å r :

At Dykkar Majestet godkjenner og skriv under eit framlagt forslag til proposisjon til Stortinget om ekstra utbetaling til mottakarar av bustøtte som hjelp til å dekkje høge energiutgifter.

Vi HARALD, Noregs Konge,

s t a d f e s t a r :

Stortinget blir bedt om å gjere vedtak om ekstra utbetaling til mottakarar av bustøtte som hjelp til å dekkje høge energiutgifter i samsvar med eit vedlagt forslag.

Forslag

til vedtak om ekstra utbetaling til mottakarar av bustøtte som hjelp til å dekkje høge energiutgifter

I

I statsbudsjettet for 2011 blir det gjort følgjande endringar:

Utgifter:

Kap.	Post	Formål	Kroner
580		Bustøtte	
	70	Bustøtte, <i>overslagsløyving</i> , blir auka med frå kr 3 830 000 000 til kr 4 148 500 000	318 500 000
2412		Husbanken	
	1	Driftsutgifter, blir auka med frå kr 320 200 000 til kr 322 200 000	2 000 000

=====

